

Na osnovu člana 72 stav (e) Statuta Univerziteta u Tuzli (Drugi prečišćeni tekst) Upravni odbor Univerziteta u Tuzli na sjednici održanoj 22.01.2015.godine donio je

PRAVILNIK

o korištenju sportskih objekata, prostora i terena Univerziteta u Tuzli

I OPŠTE ODREDBE

Član 1.

(1) Ovim Pravilnikom uređuje se korištenja sportskih objekata i terena Univerziteta u Tuzli od strane sportskih klubova, udruženja i drugih pravnih i fizičkih lica, te druga pitanja vezana uz korištenje odnosno zakup sportskog objekta.

Član 2.

(1) Sportski objekti i tereni u smislu člana 1. ovog Pravilnika su:

- 1) Univerzitetska sportska dvorana,
- 2) Sportska dvorana Filozofskog fakulteta,
- 3) Suteran ispod dvorane Filozofskog fakulteta,
- 4) Sportski tereni objekti u Kampusu Univerziteta.

II KORIŠTENJE SPORTSKIH OBJEKATA I TERENA

Član 3.

Sportski objekti i tereni iz ovog Pravilnika prvenstveno se koriste od strane Univerziteta u Tuzli, Fakulteta za tjelesni odgoj i sport i Centra za sport i ne podliježu plaćanju iz člana 7. ovog Pravilnika, a po isteku njihovog korištenja mogu se dati na korištenje i drugim korisnicima.

Član 4.

(1) Namjena sportskih objekata i terena iz člana 2. predviđena je za:

- a) realiziranje procesa studijskih programa Fakulteta za tjelesni odgoj i sport,
- b) realiziranje nastave tjelesnog i zdravstvenog odgoja i studijskih programa na fakultetima Univerziteta u Tuzli,
- c) realiziranje Projekata naučno – istraživačkog rada Fakulteta za tjelesni odgoj i sport,
- d) trenažni proces,
- e) sportska rekreacija,
- f) sportska takmičenja,
- g) realizaciju kulturnih i drugih sadržaja.

Član 5.

U izvanastavno vrijeme sportski objekti i tereni se mogu dati na korištenje pravnim ili fizičkim osobama u svrhu bavljenja tjelesnom i zdravstvenom kulturom, rekreacijom i sportovima koji su predviđeni u objektima pod nadzorom stručne, odgovorne osobe .

Član 6.

(1) Raspored korištenja sportskih objekata i terena za vannastavne aktivnosti sastavlja Centar za sport uvažavajući primarne potrebe nastave Univerziteta u Tuzli, kao mjesečni pregled, po danima u mjesecu.

(2) Raspored se ističe u sportskim objektima i terenima na vidnom mjestu.

Član 7.

(1) Ugovor o korištenju zaključuje Rektor Univerziteta na prijedlog Voditelja centra.

(2) Korisnici svih objekata i terena iz člana 2. ovog Pravilnika dužni su potpisati Ugovor o korištenju najmanje sedam dana prije početka korištenja, radi sastavljanja rasporeda korisnika.

(3) Ugovorom se definišu termini korištenja, trajanje korištenja, odgovorna osoba korisnika, naknada za korištenje, način i rokovi plaćanja naknade i svi ostali uslovi korištenja.

(4) Voditelj Centra za sport dužan je prije potpisivanja Ugovora o korištenju sportskih objekata i terena upoznati korisnika s ovim Pravilnikom i Kućnim redom, a potpisom Ugovora korisnik potvrđuje da je s istim aktima upoznat.

Član 8.

Naknada za zakup sportskih objekata i terena utvrđena je Cjenovnikom usluga.

Član 9.

Za organizovanje posebnih programa estradnog kulturnog i drugih sadržaja Korisnik je dužan ustupiti planirane termine uz mogućnost korištenja drugih prostora Univerziteta, ako za to postoji mogućnost.

Član 10.

(1) O korištenju sportskih objekata i terena vodi se evidencija o:

- a) korisnicima koje borave u sportskim dvoranama, objektima i vanjskim terenima,
- b) dolascima i odlascima korisnika,
- c) redovnim pregledima inventara i opreme,
- d) eventualnim oštećenjima, kvarovima, nedostacima i sl.

(2) Za vođenje evidencije iz stava (1) zaduženi su saradnici u sportskim dvoranama i terenima.

Član 11.

(1) Korištenje sportskih objekata i terena evidentira se mjesečno.

(2) Izvještaj se dostavlja Centru za sport, radi praćenja godišnjeg plana i programa.

Član 12.

(1) Korisnici sportskih objekata i terena plaćaju korištenje u roku od petnaest (15) dana u tekućem mjesecu po primljenoj fakturi, ako već nije Ugovorom određeno drugačije.

(2) Grupe građana, a koja nisu registrirane kao pravna lica, a zainteresovane su za korištenje sportskih objekata i terena, plaćaju korištenje unaprijed i dužne su imenovati odgovornu osobu koja će biti potpisnik Ugovora i odgovarati za sve eventualno proizašle sporove.

(3) Pravna i fizička lica uplaćuju naknadu za korištenje sportskih objekata i terena na račun Trezora, budžetska organizacija 2404001 uz navođenje i ostalih elemenata vezanih za vrstu prihoda, s tim da su dužne predložiti dokaz o uplati najmanje tri dana prije početka korištenja.

Član 13.

Ugovoreni termini korištenja sportskih dvorana, objekata i vanjskih terena biti će naplaćen, ukoliko ga korisnik ne odjavi najmanje tri dana od zakazanog termina.

III UPOTREBA OPREME I IMOVINE

Član 14.

(1) Korisnik koji prilikom korištenja sportskog objekta ili terena napravi određenu štetu istu je dužan namiriti.

(2) O stepenu počinjene štete obavlja se uvid, kojem prisustvuju Sekretar Centra za sport Univerziteta u Tuzli i Korisnik sportskog objekta ili terena, o čemu se sastavlja Zapisnik.

(3) Utvrđeni iznos štete Korisnik je dužan najkasnije u roku od osam dana uplatiti na račun Univerziteta.

Član 15.

Za redovno i normalno korištenje sportskih objekata i terena u okviru utvrđene satnice korištenja, Univerzitet će donijeti Pravilnik o Kućnom redu koji su se dužni pridržavati svi Korisnici sportskih objekata i terena.

Član 16.

(1) Za nepridržavanje Kućnog reda, stvaranje drugog nereda ili štete u sportskim objektima i terenima Korisniku se može oduzeti pravo korištenja istih.

IV SIGURNOST KORISNIKA I GLEDALACA

Član 17

Za odigravanje utakmica ili drugih sadržaja u sportskim dvoranama, objektima i vanjskim terenima, Korisnik je dužan postupiti po Zakonu o javnom okupljanju.

Član 18.

(1) Korisnik sportskog objekta ili terena prilikom njegovog korištenja dužan je poduzeti sve mjere u cilju zaštite učesnika sportske priredbe ili manifestacije, gledalaca, službenih i

drugih osoba i imovine.

(2) Prijavu javnog okupljanja nadležnoj policijskoj stanici podnosi Korisnik-organizator sportske priredbe ili manifestacije i odgovoran je za očuvanje i provođenje javnog reda i mira, u i oko sportskog objekta ili terena za vrijeme odvijanja sportske priredbe ili manifestacije, kao i po njohovu završetku, do trenutka predaje objekta.

(3) Svaki Korisnik sportskog objekta ili terena dužan je prilikom korištenja postupati u skladu sa ovim Pravilnikom, zakonima i opšte prihvaćenim i priznatim društvenim normama ponašanja.

Član 19.

Univerzitet u Tuzli ne snosi odgovornost za ozljede nastale pri nedozvoljenom ili nestručnom korištenju sprava i opreme instalirane u sportskim objektima i terenima.

V ORGANIZACIJA PROGRAMA

Član 20.

Korisnik može koristiti sportske objekte i terene samo za namjenu zbog kojeg mu je odobreno korištenje istih.

Član 21.

Prateći sadržaji u smislu postavljanja reklama su isključivo u nadležnosti Univerziteta, u čemu korisnik može sudjelovati pod posebnim i dodatnim uslovima dogovorenim sa Univerzitetom.

VI ZAVRŠNE ODREDBE

Član 22.

Ovaj pravilnik stupa na snagu danom donošenja.

UNIVERZITET U TUZLI
Broj:04-145-6/15
Tuzla,22.01.2015.godine

PREDSJEDNIK
UPRAVNOG ODBORA:

Akademik,dr.sc. Enver Zerem, red.prof.